

Zeitschrift: Nebelspalter : das Humor- und Satire-Magazin
Band: 126 (2000)
Heft: 5

Artikel: Dasch für Pfix
Autor: Stähli, Urs
DOI: <https://doi.org/10.5169/seals-596937>

Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. [Siehe Rechtliche Hinweise.](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. [Voir Informations légales.](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. [See Legal notice.](#)

Download PDF: 19.02.2025

ETH-Bibliothek Zürich, E-Periodica, <https://www.e-periodica.ch>



Dasch für Pfix

Urs STÄHLI

Wenn d'Ziircher Zinfnt am Säggssiliite wie wild ums Fiirli ummeriite, no muesch as Baasler dich scho frooge, sinn die denn bsoffe, voller Drooge, dien sich die Ziircher nit scheniere, so ne Theater duurezfiehre?

Wie jedes Joor dien d'Zinfnt marschiere und s'Ziircher Volgg duet applaudiere. Die Zinfnter traagen alti Klaidler, ich hett scho lengschens dr Verlaider, sehsch jedes Joor die gliiche Wääge, dr gliichi Fisch wo si dien drääge.

Sehsch Zinfnter, wo em Wii dien frehne, vo oobe s'gmaine Volgg verhehne. Si fiehre e Kameel schpatziere, dien frische Breetli ummeriehre. Si dängele im Taggt uffs Lise, as miesse si iir Gschigg bewiise.

Si dien au Bluemeschtrissli schwängge, dien ab und zue e Kissli schänge, si dien e Bundesroot beglaite, und maischtens sehsch au no e zwaite, si dien vill Brominänz mitfiehre und denn zem Bellevue cortègiere.

Dr Beegg in siiner wisse Roobe schoht z'ooberscht uff em Schtaapel oobe, die Helzli fange afoo brenne und Pfäardli fange afoo renne. Scho bald verglepft's em Beegg si Biire. Dämm sait mr Säggssiliite fiire.

Sehsch denn das Beeggewand verkohle, no gehn die Zinfnter ganz verschtohle ins Zunftlokal zem feyne Aesse, si dien siich au im Dringge mässe. Sinn Kepf denn root, no gehn si uuse und dien blagiere, s'kennt aim gruuse.

Si gehn ins Nochber Zunfthuus duure und mässe siich im dumme Schnuurre, dien ab und zue e Witzli mache, und alli Zürcher dien scheen lache. As Baasler macht di das ganz grangg, fasch wie n en Baasler Schnitzzellbangg.